

-GODIŠNJI IZVJEŠTAJ-

**o realizaciji mjera za poboljšanje uslova poslovanja u poljopivrednoj
proizvodnji i prehrambenoj industriji Bosne i Hercegovine**

Ministarstvo vanjske trgovine i ekonomskih odnosa

**Sarajevo
2011. godina**

Sadržaj:

I. Godišnji pregled aktivnosti o realizaciji mjera za poboljšanje uslova poslovanja u poljoprivrednoj proizvodnji i prehrambenoj industriji Bosne i Hercegovine	3
1. Uvod.....	3
2. Realizirane mjere.....	4
3. Aktivnosti na izvršenju ostalih mjera.....	6
II. Tabelarni prikaz realizacije mjera za poboljšanje uslova poslovanja u poljoprivrednoj proizvodnji i prehrambenoj industriji Bosne i Hercegovine.....	10

I. Godišnji pregled aktivnosti o realizaciji mjera za poboljšanje uslova poslovanja u poljoprivrednoj proizvodnji i prehrambenoj industriji Bosne i Hercegovine

1. Uvod

Prijedlogom mjera za poboljšanje uslova poslovanja u poljoprivrednoj proizvodnji i prehrambenoj industriji Bosne i Hercegovine, Ministarstvo vanjske trgovine i ekonomskih odnosa, po prvi put, uticalo je na politike koje mogu donijeti, kako u kratkoročnom periodu, tako i u dužem vremenskom roku, konkretne ekonomske efekte, a za čiju implementaciju su zadužene imenovane institucije s utvrđenim rokovima izvršenja. Prihvatajući navedene mjere od strane Parlamentarne skupštine BiH, stvorili su se uslovi za ažurnije reagiranje nadležnih institucija u cilju rješavanja niza problema s kojima se susreću poljoprivredni proizvođači i prerađivači u Bosni i Hercegovini.

U proteklom periodu Vijeće ministara BiH, na 136. sjednici, održanoj 02. novembra 2010. godine, razmotrilo je i usvojilo šestomjesečni Izvještaj o realizaciji mjera za poboljšanje uslova poslovanja u poljoprivrednoj proizvodnji i prehrambenoj industriji Bosne i Hercegovine, sa zaključkom:

„Zadužene su sve institucije nadležne za izvršenje mjera da Ministarstvu vanjske trgovine i ekonomskih odnosa redovno dostavljaju ažurirane izvještaje o realizaciji mjera za poboljšanje uslova poslovanja u poljoprivrednoj proizvodnji i prehrambenoj industriji Bosne i Hercegovine“.

O navedenom zaključku Ministarstvo vanjske trgovine i ekonomskih odnosa obavijestilo je nadležne institucije dana 08. novembra 2010. godine, napominjući mjere za koje su nadležni, te o šestomjesečnom izvještaju informiralo Komisiju za vanjsku trgovinu i carine Parlamentarne skupštine BiH.

Nadalje, u cilju izrade opširnijeg i sveobuhvatnog godišnjeg pregleda implementacije mjera, zatraženi su, dana 20. decembra 2010. godine, te 25. marta 2011. godine, pojedinačni izvještaji od imenovanih institucija, prema propisanim nadležnostima i zaduženjima. Ključni problemi u izradi godišnjeg izvještaja ogledaju se u činjenici da dostavljeni pojedinačni izvještaji nadležnih institucija su različitog kvaliteta ili nisu dostavljani na vrijeme, a u nekim slučajevima nisu uopće, uz izuzetke za pojedine institucije, odnosno za pojedine mjere. Neki od uzroka ovakvog stanja su nizak nivo predanosti institucija na provođenju mjera, te nedostatak kapaciteta u najvećem broju institucija.

I pored navedenih problema, na osnovu dostavljenih informacija o implementaciji usvojenog dokumenta, Ministarstvo vanjske trgovine i ekonomskih odnosa izradilo je godišnji pregled realiziranih aktivnosti i djelimično izvršenih mjera za koje je potreban duži vremenski period ostvarenja.

2. Realizirane mjere

U proteklom periodu od godinu dana, kroz djelovanja nadležnih institucija, učinjen je značajan napredak u realizaciji usvojenih mjera, i time stvoren osnov za jačanje privrede Bosne i Hercegovine i snažniju njenu ulogu na tržištu drugih zemalja.

U cilju poboljšanja, smanjenja deficita, te izrade odgovarajućih politika za poboljšanje uslova poslovanja domaće proizvodnje, na prijedlog Ministarstva vanjske trgovine i ekonomskih odnosa, Vijeće ministara BiH je, na 130. sjednici, održanoj 19. avgusta 2010. godine, usvojilo i razmotrilo dokument „Proizvodno-potrošni i vanjskotrgovinski bilansi za 2009. godinu“ kojim se stiče cjelokupan uvid u trgovinski promet (uvoz/izvoz) Bosne i Hercegovine. Na taj način stvorena je baza za izradu realnih i efikasnijih politika za poboljšanje uslova poslovanja domaće proizvodnje, te izvršene **mjere broj 1. i 2.** predmetnog prijedloga.

Realizacija niza zahtjeva bosanskohercegovačkih proizvođača iz različitih oblasti poljoprivredne proizvodnje i prerade rezultirali su donošenjem nove i/ili izmjenama i dopunama postojeće legislative BiH.

Vezano za to, na prijedlog Ministarstva vanjske trgovine i ekonomskih odnosa Vijeće ministara BiH je, na 106. sjednici, održanoj 03. decembra 2009. godine, donijelo Odluku o dopunama Odluke o utvrđivanju količina tarifnih kvota, s kojom se želi uticati na neregularnost kvota mašinskog i iskoštenog mesa. Odlukom je regulirano pitanje tarifnih kvota komada bez kostiju i klaničnih proizvoda od kokoši vrste *Gallus domesticus* u blokovima i smrznutim komadima, te su zahtjevi kompanija koje se bave peradarskom proizvodnjom u BiH u većem dijelu usvojeni. Pokretanjem procedure donošenja navedene Odluke na Vijeću ministara BiH predstavlja izvršenje **mjere broj 4.**

Jedan od najvažnijih segmenata vezanih za zaštitu domaće proizvodnje od prekomjernog uvoza predstavljen je **mjerom broj 6.** koja se odnosi na izmjenu i dopunu propisa u cilju pojednostavljenja procedure i postupaka dokazivanja i predlaganja mjera zaštite. Na prijedlog resornog ministarstva Vijeće ministara BiH je, na 101. sjednici, održanoj 13.01. 2010. godine, donijelo Odluku o izmjeni i dopuni Odluke o mjerama zaštite domaće proizvodnje od prekomjernog uvoza i Odluku o izmjeni i dopuni Odluke o postupku i načinu utvrđivanja antidampinške i kompenzatorne dažbine. Usvojene Odluke objavljene su u „Službenom glasniku BiH“, broj 16/10.

Nadalje, u cilju zaštite domaće proizvodnje, te u skladu sa zahtjevima bosanskohercegovačkih proizvođača i prerađivača, na Parlamentarnoj skupštini BiH, na 71. sjednici Predstavničkog doma, održanoj 03. i 10. 02. 2010. godine i na 43. sjednici Doma naroda, održanoj 23.02. 2010. godine, razmotren je i usvojen Zakon o izmjenama i dopunama Zakona o carinskoj tarifi BiH. Navedeni Zakon objavljen je u „Službenom glasniku BiH“, broj 14/10, čime je izvršena i **mjera broj 5.**

Uz izmjenu Zakona o carinskoj tarifi, Ministarstvo vanjske trgovine i ekonomskih odnosa u saradnji s nadležnim institucijama izradilo je dopunu Zakona o carinskoj politici, koja je utvrđena **mjerom broj 19**. Nakon završene parlamentarne procedure razmatranja i usvajanja navedenog Prijedloga, Zakon je objavljen u „Službenom glasniku BiH“, broj 54/10 i stupio je na snagu osmog dana od dana objavljivanja.

Neophodno je napomenuti da je u toku izrada novog Zakona o carinskoj politici, čiji Nacrt izrađuje Ministarstvo vanjske trgovine i ekonomskih odnosa u saradnji s nadležnim institucijama i uz podršku Twining projekta.

Također, od strane Ministarstva vanjske trgovine i ekonomskih odnosa pokrenuta je inicijativa za dopunu Zakona o akcizama u cilju oslobađanja repromaterijala od dodatnih dažbina (plavi dizel, mineralno đubrivo, sjeme i sadni materijal itd.) prema nadležnom ministarstvu za implementaciju navedenog Zakona, odnosno prema Ministarstvu finansija i trezora BiH.

Inicijativa za pokretanje navedene procedure upućena je, u više navrata, ali odgovor o daljnjem radu na dopunama zakona nije uslijedio. S pokretanjem inicijative, kako i glasi navedena **mjera broj 20**, nadležnosti Ministarstva vanjske trgovine i ekonomskih odnosa su ispunjene.

Nakon usvajanja Zakona o duhanu Bosne i Hercegovine od strane Parlamentarne skupštine BiH i njegovog objavljivanja u „Službenom glasniku BiH“, broj 32/10, pristupilo se izradi podzakonskih akata ovog Zakona. U cilju izrade akata, te ostvarenja **mjere broj 21**, ovog Prijedloga, resorno Ministarstvo u saradnji s nadležnim entitetskim institucijama i Brčko Distriktom BiH, provelo je zakonsku proceduru izrade Prijedloga pravilnika o uslovima za proizvodnju duhana, Prijedloga pravilnika o mjerilima procjene duhana u listu i Prijedloga pravilnika o uslovima za obavljanje djelatnosti otkupa i obrade duhana. Navedene podzakonske akte nakon razmatranja i usvajanja, donosi Vijeće ministara Bosne i Hercegovine. Nakon izrade i prikupljanja potrebnih mišljenja na Prijedloge pravilnika, isti su upućeni u proceduru razmatranja i usvajanja na Vijeće ministara BiH. Pored navedenih Prijedloga podzakonskih akata, na osnovu člana 36. i člana 37. Zakona o duhanu Bosne i Hercegovine („Službeni glasnik BiH“, broj 32/10) resorno Ministarstvo u saradnji s nadležnim organima entiteta i Brčko Distrikta BiH, izradilo je Pravilnik o registriranju i uslovima za obavljanje djelatnosti prerade i proizvodnje duhanskih proizvoda, Pravilnik o razvrstavanju cigareta i markama i Pravilnik o sadržaju obrazaca i načinu vođenja registra koji su upućeni u proceduru razmatranja i potpisivanja od strane ministra.

Pored mjera koje se odnose na zakonodavni, bazni dio stvaranja uslova za napredovanje privrede u Bosni i Hercegovini, značajan korak ostvaren je u oblasti poboljšanja postojećeg IT sistema koji koristi granična veterinarska inspekcija radi brže i efikasnije razmjene informacija, dokumenata i provjere pošiljki, označenoj kao **mjera broj 17**. Svakom graničnom veterinarskom prijelazu omogućeno je da ima internet konekciju i kroz elektronsko ispunjavanje obrasca tzv. ZVUD-a svi granični veterinarski prijelazi su uvezani u jedan sistem ne samo sa Uredom za veterinarstvo već i sa predstavnicima uvoznika-špediterima. Na osnovu ovih informacija, u svakom momentu se može provjeriti koliko je pošiljki pregledano u toku dana na svakom prijelazu pojedinačno, koliko ima najavljenih pregleda za naredni dan, kakva je struktura uvoza i drugi podaci.

Kako je ranije navedeno, cilj realizacije mjera predstavlja i pružanje pomoći bosanskohercegovačkim proizvođačima i prerađivačima, te su tokom 2010.godine u prostorijama MVTEO u saradnji sa Vanjskotrgovinskom komorom BiH održana tri odvojena sastanka s predstavnicima većih trgovačkih lanaca na temu: „Učešće domaćih proizvoda u većim tržišnim centrima na teritoriji BiH“. Rezultat ovih sastanaka bio je uspostavljanje saradnje između proizvođača i tržišnih centara. Neke od njih su i dogovori između Interex-a CDE BiH i proizvođača na teritoriji Bosne i Hercegovine, o plasmanu domaćih proizvoda, zatim projekt u tržišnom centru Mercator pod nazivom „100% domaća zimmica“, kao i mnogi drugi uspostavljeni kontakti i između tržišnih centara i domaćih proizvođača. S ciljem nastavka uspješne saradnje u novembru održan je još jedan sastanak na istu temu gdje su predstavnici trgovačkih lanaca upoznali prisutne s kontinuiranom saradnjom s domaćim proizvođačima, a neke od njih su i projekt pod nazivom „Naša bašta“ u Mercatoru, zatim plasiranje domaćih proizvoda pod okriljem robne marke u Konzumu i Tušu, kao i mogućnosti plasiranja bosanskohercegovačkih proizvoda u ovim tržišnim centrima i van teritorije Bosne i Hercegovine, što ujedno predstavlja i realizaciju **mjere broj 14**.

3. Aktivnosti na izvršenju ostalih mjera

U periodu od godinu dana, napravljen je značajan pomak u aktivnostima za realizaciju mjera od strane nadležnih institucija, a koje su vezane za duži rok ostvarenja. Ukratko ćemo se osvrnuti koje su to mjere, dok je opširniji prikaz predstavljen u „Tabelarnom pregledu realizacije mjera“.

Jedno od najvažnijih pitanja u cjelokupnom razvoju BiH predstavlja akreditacija laboratorija, te priznanje certifikata o kvalitetu u okviru CEFTA zemalja. Napredak u ovoj oblasti, propisanoj **mjerom broj 12**, pružile su Uprava BiH za zaštitu zdravlja bilja i Ured za veterinarstvo BiH, te pojedini sektori resornog ministarstva kroz pokretanje procedure pregovaranja radi potpisivanja ugovora za međusobno priznavanje liste laboratorija i certifikata o kvalitetu u okviru CEFTA zemalja.

Također, u okviru realizacije navedene mjere neophodno je navesti realizaciju usvojene Mape puta s ciljem stvaranja uslova za izvoz proizvoda životinjskog i biljnog porijekla, s konkretnim rokovima i izvršiteljima, a čija se potpuna realizacija očekuje tokom 2011.godine.

Druge mjere čija je realizacija u nadležnosti Uprave BiH za zaštitu zdravlja bilja, te Ureda za veterinarstvo doživjele su visok stepen realizacije. To se odnosi na **mjere broj 9., 10. i 11.** o uspostavljanju fitosanitarne inspekcije na osnovu Zakona o zaštiti zdravlja bilja, te osiguranju odgovarajućih uslova za inspekcijску veterinarsku kontrolu na graničnim prijelazima radi osiguranja uvoza zdravstveno ispravnih i kvalitetnih proizvoda i osiguranju zadovoljavajućeg zdravstvenog statusa populacije životinja u Bosni i Hercegovini kada se radi o bolestima.

Uprava BiH za zaštitu zdravlja bilja također je izvijestila o realizaciji **mjere broj 18**, koja se bliži svojoj konačnoj realizaciji. Naime, Inspektorat FBiH nije imao potpuno riješeno pitanje stručne podrške iz oblasti IT, pa time nije mogao adekvatno odgovoriti na sve zahtjeve u vrijeme trajanja samog Projekta SPIRA, kao što je to slučaj i u Inspektoratu RS. WB je prihvatila odluku Inspektorata kao i ponuđeno rješenje koje je dao Inspektorat FBiH. PIU FBiH pokrenuo je aktivnosti, da u saradnji s Inspektoratom ispituju ponuđeno rješenje koje će

dovesti do krajnjeg cilja, odnosno do realizacije informacijskog sistema za Inspektorat koji će djelovati u sklopu sveobuhvatnog informacijskog sistema u poljoprivredi.

U tom cilju Inspektorat FBiH je pokrenuo i završio aktivnosti povodom kupovine sistema. Također, ARDP Projekt finansirat će aktivnosti koje trebaju sistem dovesti u punu funkciju i time ostvariti krajnji cilj, a to je razmjena podataka kako s institucijama inspekcijskog nadzora, tako i s ostalim institucijama i Upravom BiH za zaštitu zdravlja bilja. U toku je tehnička realizacija navedenih aktivnosti uz pomoć IT konsultanta angažiranog iz projekta ARDP koje će pomoći Inspektoratu FBiH razviti IMS u punom kapacitetu, čime bi se zacrtana mjera ispunila u potpunosti.

U cilju provođenja i striktno primjene propisa i procedura za utvrđivanje carinske vrijednosti i prilikom carinjenja uvoznih roba u BiH za proizvode: žitarice, voće, povrće, mlijeko i mliječni proizvodi, mesoprerađevine, med, vodu i pivo, a što je regulirano **mjerom broj 3**. Ministarstvo vanjske trgovine i ekonomskih odnosa je tokom 2010. godine s predstavnicima Uprave za indirektno oporezivanje BiH pokrenuo razgovor na temu „Carinska vrijednost, količina i identitet roba“ u cilju olakšanja prometa roba s Republikom Makedonijom. Predstavnici UIO BiH su skrenuli pažnju na kompleksnost tog problema za koji je potrebno uraditi detaljne analize, te su dogovorene daljnje aktivnosti za 2011. godinu.

U cilju implementacije **mjere broj 13**, koja se odnosi na izradu Strategije robnih rezervi, uspostavljena Radna grupa je u proteklom periodu, a imajući u vidu nadležnosti u ovoj oblasti održala 7 sastanaka i Okrugli sto. RG je usvojila Listu aktivnosti za izradu Nacrta Akcionog plana za robne rezerve u Bosni i Hercegovini kao polaznu osnovu uz mogućnost daljnje nadogradnje i proširivanja tokom implementacije FAO projekta. U oktobru 2010. godine FAO je odobrio TCP projekt 3302 „Pomoć u razvoju Strategije robnih rezervi u hrani u Bosni i Hercegovini“. U decembru 2010. godine započela je implementacija projekta i održan je Okrugli sto s učešćem FAO eksperata, članova RG za robne rezerve i drugim zainteresiranim stranama. Urađen pregled sadašnjeg stanja, legislative i nadležnosti u oblasti robnih rezervi. Od 2011. godine otpočelo se sa FAO radionicama, te će se u maju 2011. godine finalizirati FAO projekt i pristupiti izradi Nacrta Akcionog plana. Izmjenama Plana ova je aktivnost predviđena da se završi u novembru 2011. godine. Po usvajanju DEP Strategije pristupilo bi se i izradi sveobuhvatne Strategije za robne rezerve u Bosni i Hercegovini (2011-2013) čime bi se osigurao uslov nadležnosti MVTEO u ovoj oblasti.

Kako bi odgovorili zahtjevima procesa harmonizacije mjera podrške proizvođačima na teritoriji cijele BiH predloženom **mjerom broj 15**. Ministarstvo vanjske trgovine i ekonomskih odnosa je u proteklom periodu iniciralo i organiziralo niz sastanaka tehničkog tima za harmonizaciju, te podsticalo i pomagalo učesnike u ovom procesu u okviru nadležnosti koje su mu dodijeljene. U periodu oktobar – decembar 2010. i januar – mart 2011. godine, održano je nekoliko sastanaka na ovu temu, ali su urađene i značajne aktivnosti tehničke i analitičke podrške ovom procesu. Odabrane su dvije teme, proizvodnja mlijeka i mesa radi svog izuzetnog značaja u poljoprivredi BiH, te je dogovorena harmonizacija mjera podrške proizvođačima mlijeka između entiteta RS i FBiH. U tom kontekstu Sektor je pripremio i dokument/plan aktivnosti na harmonizaciji mjera podrške proizvođačima u 2011. godini. Ovaj plan će se predstaviti članovima tehničkog tima na prvom narednom sastanku. Također su započeti poslovi na izradi sveobuhvatne analize podrške proizvodnjama u BiH čiji bi se rezultati koristili u nastavku ovog procesa. U pogledu dijela definiranja koeficijenata za

određivanje komercijalnih i nekomercijalnih gazdinstava, oba entiteta su utvrdila kriterije koji će se koristiti za ovu svrhu i koji će se primjenjivati od ove godine.

U prethodnom periodu, u cilju izvršenja **mjere broj 16.** tehničku podršku članovima Radne grupe „Privremeni odbor za uspostavljanje sistema monitoringa i evaluacije za sektor poljoprivrede, ishrane i ruralnog razvoja (RG za M&E)“, pružili su eksperti projekta EK „Jačanje kapaciteta za programiranje ruralnog razvoja u BiH (3P-BHRD projekt)“. Podrška 3P-BHRD projekta ogledala se prvenstveno u edukaciji, članova pomenute radne grupe. U okviru 3P-BHRD projekta organizirana su III modula obuke u kojoj su pored članova RG za M&E učestvovali i članovi Tehničkog tima za harmonizaciju mjera ruralnog razvoja. Također, u okviru aktivnosti 3P-BHRD projekta izrađen je Nacrt prijedloga strukture Odbora za monitoring BiH i Nacrt evaluacijskog okvira za mjere ruralnog razvoja (koje su u procesu harmonizacije) BiH.

Nadalje, u cilju ruralnog razvoja, te ostvarenja **mjere broj 24.** dvije već harmonizirane mjere (1. Ulaganja u proizvodnju mlijeka, 2. Razvoj ruralnih zajednica/LEADER LAG) su unaprijeđene. Postignut je dogovor s korisnicima o razvoju nove, treće mjere, koja će podržati razvoj ruralne male tehničke infrastrukture. Ovaj proces je započet i planirano je da bude završen u maju 2011. godine.

Razrađuju se i tri tehnička kratka opisa (za podmjere - Ulaganja u gazdinstva koja se bave proizvodnjom mlijeka (mljekarska gazdinstva); Unaprjeđenje profesionalnih vještina i stručnosti osoba uključenih u mljekarsku proizvodnju u BiH, putem ciklusa specijalizirane obuke; LAG mjera tipa LEADER), u cilju unaprjeđenja njihovog sadržaja i relevantnosti za nacrt okvira programa ruralnog razvoja. Korisnici su postigli dogovor vezano za izradu nove mjere koja će bolje odraziti potrebe ruralnih zajednica kao i dogovor koji su interesne grupe postigle, o harmonizaciji za zajednički okvir programa ruralnog razvoja u Bosni i Hercegovini.

Mjere su unaprijeđene, u okviru dostupnih informacija i podataka s kojima se može obrazložiti njihovo buduće korištenje i prilagođavanje striktnijim zahtjevima Evropske unije, kada za to dođe vrijeme. Ovakav preokret u odluci o jednoj od mjera doveo je do toga da projekt 3PBHRD (podršku pruža EU Projekt „Jačanje kapaciteta za programiranje ruralnog razvoja BiH“) započne detaljniji pregled i razradu njenog finalnog oblika.

Razvoj tehničkih kratkih opisa pilot mjera i prilagođavanje za probno korištenje u entitetima /Brčko Distriktu - Pilot harmonizirani kratki tehnički opisi u okviru harmonizacije za 1. Ulaganja u mljekarska gazdinstva, 2. Formiranje LAG-ova, 3. Razvoj tehničke infrastrukture. Konsultant se koncentrirao na izradu tehničkih opisa u skladu sa smjernicama EU okvira za programiranje i tokom mnogobrojnih konsultacija s korisnicima. Ovaj rad zahtijeva kompleksan pristup u dizajniranju tehničkih opisa za koje se očekuje da ispune potrebe i očekivanja različitih korisnika u procesu programiranja.

Posljednja **mjera broj 25.** ali i ne manje bitna mjera odnosi se na uspostavljanje tijela i strukture za preuzimanje IPARD fondova. Radne grupe u toku prethodnih godinu dana rada nisu postigle konsenzus oko izgleda/organizacije buduće IPARD strukture u BiH. Najveći problem u čitavom procesu je nerazumijevanje regulativa EU, povlačenje pitanja nadležnosti za koje članovi radne grupe u najmanju ruku nisu kompetentni, kao i različito tumačenje nadležnosti nad procesom evropskih integracija i poljoprivrede u BiH. Ipak za sada su urađena dva prijedloga koja su poprilično udaljena jedan od drugog. U okviru aktivnosti

veanih za tehničku podršku formiranju IPARD Upravljačkog odbora eksperti projekta „Jačanje kapaciteta za programiranje ruralnog razvoja u BiH (3P-BHRD)“, pripremili su „Predlog koncepta Upravljačkog tijela“. Radna grupa za uspostavljanje upravljačkog odbora kao državnog tijela odgovornog za upravljanje IPARD programom, u drugoj polovini 2010. godine je radila sa smanjenim intezitetom zbog izmjena članstva RG koja je nastala kao posljedica kardrovskih promjena unutar nadležnih institucija.

Pored mjera čija implementacija se zahtijeva na nivou državnih organa, **mjere pod brojem 22. i 23.** su u nadležnosti entiteta Bosne i Hercegovine. U skladu s izvještajima entitetskih ministarstava poljoprivrede određena usklađenost entitetskih Zakona o poljoprivredi sa Zakonom o poljoprivredi na državnom nivou izvršena je u proteklom periodu uz potrebu dodatnih izmjena koje su predviđene Planom rada Ministarstva poljoprivrede, šumarstva i vodoprivrede RS za 2011.godinu, dok je Federalno ministarstvo poljoprivrede, vodoprivrede i šumarstva uskladilo svoj Pravilnik o registru poljoprivrednih gazdinstava i registru klijenata s Odlukom o harmoniziranim registrima poljoprivrednih gazdinstava i registra klijenata BiH, međutim Odluka o registrima poljoprivrednih gazdinstava i registra klijenata BiH još nije usvojena. Nadalje, prioritetno ažuriranje i usvajanje Operativnih programa entiteta i Brčko Distrikta BiH u cilju implementacije Strateškog plana BiH za harmonizaciju poljoprivrede, ishrane i ruralnog razvoja 2008-2011 provodi se kroz Strategiju razvoja poljoprivrede i Strateški plan ruralnog razvoja na osnovu kojih su donesena dva Akciona plana za relizaciju istih u Republici Srpskoj i koji se u većini aktivnosti poklapaju s Operativnim programom u cilju implementacije Strateškog plana BiH za harmonizaciju poljoprivrede, ishrane i ruralnog razvoja. Operativni program Federacije BiH za realizaciju obaveza iz Sporazuma o stabilizaciji i pridruživanju za oblast poljoprivrede, ishrane i ruralnog razvoja (za period 2008-2011) i implementaciju Strateškog plana BiH za harmonizaciju poljoprivrede, ishrane i ruralnog razvoja je polovinom 2010.godine ažuriran u dijelu koji se odnosi na vremenski period, tako da je period provođenja planiranih aktivnosti prolongiran do kraja 2012. godine i u planu je pokretanje nove procedure za usvajanje ovog dokumenta od strane Federacije Bosne i Hercegovine.